



孫堂集卷之八

新都吳文奎茂文甫著

友人程涓巨源甫閱

行狀

三弟吳廷用行狀

國子生文章余第三弟也嘉靖壬子歲先府君  
夢神人介而繞屋號於衆曰勿畏吾護送子若  
踉蹌拜受未幾舉奎浹旬爲五月五日復舉弟  
先府君喜併錫以嘉名曰文章垂髫斬陽周先

生字之廷用其說謂海剛峰主政直言天下第  
一事是有用文章先君程督嚴游第于盛公程  
公汪公習爲易廩廩日誦千餘言經史及貼括  
制義多所默記第自運不工以故試郡邑間在  
高等歲壬申先君貌癯自虞趣二三兄弟就督  
學使者周公試入成均亡何熒然共在衰經中  
閭里方慮多財啓爭賢者不免第實力調劑和  
解得免於口實萬曆丙子析產第與余同居考  
室鳩工聚材曲勢面皆匠余意第自外歸竟稱

安居無改丙子第喪室及幼子余時携家白下  
信往來慰籍叅酌喪祭語多遙合己卯弟同余  
試留都值司成許公司業張公謬爲借獎弟揚  
揚雀躍日趣童僕市甘毳餉余挑燈煮茗伺候  
丙夜常呼謂弟等庸才不難謝去舉業慰先靈  
於地下恃有兄耳誠一心進取卽有塵鞅請身  
肩之余罷歸甚愧其意壬午余母謝捐館弟母  
李朝夕哭之痛母李尋寢疾明年四月亦逝先  
後在疚襄事形影相弔也癸未同弟舉喪祭奠

如禮殯二母于孫村之陽卜地未妥繼同易厝  
井亭繼又同附于先君墓側甲申張江陵當國  
下郡縣經業定稅徼俗故囂訟爭因蝟起某氏  
穉驕弟以閔口渡先塋詞連及第弟毅然對簿  
自理塋畔地卒歸吾家乙酉閔川程鑰公弟故  
婦舅也暴死遺孤瞽而幼族豪妬其腹產剝噬  
之弟倡諸倩相援護亡應者獨捐重貲白其寃  
事竣償以田第堅却曰程公故詞人章托在肺  
腑柰何敢耳此言余在側戲謂阿章汝豈吳章

弟子何節俠爾爾也丙戌惡少橫里門余與弟  
輩謀衡之家逮惡少棄妻于余畏者巧背成弟  
稱禦侮之謂何而終閱墻爲也矢死饘橐其間  
惡東不得逞久之復誣余及諸生文昭弟更賈  
勇周旋睨者知共濟有人承伏乃解丁亥歲侵  
畢族故世姻有賣其子爲弟奴者媒隱其自給  
以他氏久之弟知爲名家子卽焚其券揖遣之  
歸女兄之適畢濂也厄于繼母避地晉陵富人  
子利其有比周蔽罪于濂宰分其產弟要余赴

蘇氏之急蓐食露寢費實不貲卒免于魚肉弟  
之力也弟後復分已推予不必其償已丑弟以  
築精舍家居值多事旁午利權付家幹雲龍龍  
侵牟母錢千五百緡會弟往視出逃弟緩之使  
歸收債庚寅余與弟同寓於楚黃江上持蠟貫  
酒日召諸伎爲楚歌楚舞猶戀不能別弟曰吾  
輩髮種種數在陽九難乎其免於今之歲日者  
舟過小姑幾壓于崩岬及遊僧死籬落下得脫  
虎口幸之幸矣奈何舍我而西屬風雨連牀商

兌內外政者屢日居無何治裝歸甫造謁諸知  
交中腕積痰痛以十二月廿四日卒得年三十  
九先是疾作友人劉國成寬以福善無多慮等  
語第曰回也不延安在其爲不善也弟卽數手  
書與余訣囑視其妻子惟家旁落是懼自擬必  
死屏遠繼室程氏爲子計長久誠用薄葬母生  
分毋佞浮屠縷縷多格言程問後事正色謝之  
處分有吾兄在蓋痛懲尹伯奇申生之禍意念  
深矣第生而清癯短小天性沉毅步履矯健言

訥訥不出口喜怒否臧渾渾如也乍交皮相疑  
其草野倨傲者什一易其粥粥無能者什九逮  
與之久處臨事則內行敦篤情縈於禮慮周於  
變一切禍福久暫利鈍雖豪俠揮霍之夫矯飾  
矜激之士難傲之以所長行且遜之矣語曰蓋  
棺論定不佞剛躁異性而趣向獨與弟同其喪  
神實質無足云者顧聞父老之惜弟曰曠世善  
人未見其止閭巷之哭弟曰善人喪世天必阜  
其後里中學士之論祥人曰先達推辰州後進

讓吳季姻婭流寓道及弟輒雪涕歎其高誼噫  
傷哉傷哉年不滿強仕施不逮邑屋恂恂篤行  
長者之稱胡爲乎來哉余不忍論著吾弟特識  
其大都如此以俟大雅君子憐而傳之

### 東渠翁狀

東渠翁余族屬兄也諱勝祖又文祖字惟承舍  
東有渠入夏流水粼漣樂之遂別號東渠翁爲  
世祿公獨子九歲父見背恃大父寄巖公父之  
業已耄勸勤矣母程孺人織紵當戶翁幼短而

肥游學家塾相者言兒面孔如鼓壽止十五里  
媪私語程孺人程孺人持之泣曰不幸三世如  
綫卽孺子無年柰宗祏何久之拮据父大父喪  
家益中落甫弱冠謀行賈乏資斧會膏腴田與  
素封隣售得善價翁喜擔囊往苦身戮力泝湘  
漢歷河洛轉逐什一爲期三四易寒暑始一歸  
省會數竒時羸時詘厪厪糊其口然翁愈挫愈  
厲終不以拆閱故懈弛亡何息子有益有義有  
和長膂力過人且善決策從翁東西相佐販木

棉布帛租載出入吳魏間遂駸駸羸得過當翁  
抵子舍覲程孺人程孺人詰翁橐中裝幾何翁  
再拜曰籍母氏寵靈歲入可比中人之產孺人  
喜因蹙額曰始願不及此福驟集不祥爾其中  
分母錢費一於產費一於賈卽不虞故吾旣脫  
足耕也翁受成自是經營稍獲竒羨輒市田舍  
值群從連墻者業寢削先後迺售於翁翁迺償  
以昂直直金俱累百囊幾傾翁殊無吝色曰母  
命在卽幸減貲何如減產時第挈囊昔所齎與

二三子跳驅馳逐以故終翁之身矻矻未遑產  
日益貲日損同時在事者多登上賈而翁三致  
千金退竟食舊云翁素性醇謹篤於人倫自御  
甘菲薄浣衣敝履攻苦食淡制一裘完一器非  
數十年不易新至賓朋喪祭婚嫁則先按故事  
或長老經行者或耳目覩記者度用其蔽取朴  
畧簡潔文采蓄於鋪張而真意有餘蓄矣折節  
好下人由少至老儕俗同塵不辨枯茂于知交  
無齟齬無脂膏無磬折亦無巖立比落守勝者

就翁質成翁輒曰叔季風波烏用別黑白若懸  
寓哉幸和解卒無所斧斤益翁蚤歲孑立兩遭  
無賴子及期親相構赤手自理備歷畏途躬親  
涉世之難故如此然數有天幸常循淮達吳會  
附舟者盜之渠率翁初不覺比別告以姓名曰  
感翁善視某萑苻在夏港異日者無忘當引避  
後經其地風逾群舟遭劫掠翁如前呼者再盜  
果散去得獨完翁敬事鬼神最皈依者玄帝晨  
昏香火曾不暫輟渡揚子波濤洶湧檣折楫亡



長年譁勢在不抹忽霾霧中現神人仗劍呵護  
獲濟無恙年屆老召諸子析產手自爲割令射  
覆當之租粟各釜鍾基址各一區圃各數畦惟  
籬無遺金曰恐兒輩損志益過也榻內鮮佳治  
自丁年喪其伉儷舉勝人治薪水屏處小室塊  
然終日間扶杖過里門曝背清談卽諸子代興  
競爽人皆爲翁嘖嘖翁罔聞知萬曆辛卯三月  
初四考終正寢距所生正德乙亥享年七十八  
嗟乎里俗季矣游閒闔其捷夸毗角其靡黃口

初如老成喙長三尺譬日遊契之穀中政於何  
施風於何維若翁者悃悃無華不邇聲名不設  
機械古貌古心其渾沌未竅耶迺阜昌在後裔  
典刑在閭里柱下謂天道猶張弓不虛矣余少  
文翁仲子有義以某月某日殞固請漫摭質行  
胥命作者

從兄文苑先生行狀

歲在乙未從兄文苑先生病脾斷酒越三月且  
殊父老近屬迺臨視里中諸文學迺進問國醫

孫一奎吳彰診切謝法在不治却糈而去二十  
有三日卽世屬纊復含歛如禮帷內外哭泣擗  
踊盡哀弔唁踵至徑草蹂且墳友人程巨源語  
奎先生里閭高士傷哉貧也余銘若狀不作何  
待奎是以忘其椎陋飲泪狀先生先生故名文  
林字廷翰旣以字行則更文苑諸學士以其年  
長稱之曰先生遂稱文苑先生云王父舉伯考  
先考二昆兢爽伯考五丈夫子先生寔當室爲  
繼祖小宗伯考蚤業掌故功令憤不克逞志於

有司授先生書日討而訓之聞歛人吳紹周楚  
人夫已氏婺人汪敬脩善典謨訓故門徒子弟  
多起家先後具脩贄遣先生就之學無何督學  
使者黃公按新安先生甫弱冠補諸生伯考程  
督嚴日幾幾望有成然先生才出中駟下卽志  
在千里卒不能抉轡長鳴又日閑輿衛無暇問  
家人生產竟落魄困守明經初伯考氣槩軒豁  
狹累世之業意在服膺亢宗一試輒効凡冠側  
注以談稅過從者館穀僕被如歸累日夜畧無

勸恠久之屢試用功伯考方督先生過會入間  
者言召先生先生自度無他屏屢赴楚途次行  
李乏絕不辦鮭菜舟人呼順風先生持脫粟飯  
和之成韻相樂也既抵子舍伯考質數之沒入  
囊橐絕供億弗予先生始齋用不給然先生故  
受室於黃黃爲古林右族黃公雪亭雅奇先生  
治命分女錢視男等資遣丘嫂甚盛不下千餘  
緡當伯考豪舉時先生悉索篋中刀布出佐施  
予興作不遺餘財客說先生曰乃翁螽斯若而

人秀才卽稱說孝友獨不爲異日息子地耶先  
生謝客罷勿談蘊財生孽廷翰嚶嚶何至靳儻  
來而衡成命從嫂氏重違夫子意脫故裝不無  
憤懣鬱成痼疾每病一發衽席水火甘醴鴛羽  
先生詞其底裏第徐徐延良調劑之沒齒無芥  
蒂伯考季年慕陸賈之誼召諸子覆射異產析  
居先生獨有天幸基址得其爽塏者釜鍾田得  
其腴者然食指日繁別鮮歲賦數十年來嫁一  
女婚三男祭祀賓朋燕會往來一切取辦是且

也天性慈祥知交告窘不難舍已殉人如母黨  
某子甲稱貸子錢家先生代爲立券後收責者  
嘖有煩言先生破百金產爲贖券歸質劑不已  
遂至易宅易宅不已遂至市田逋負逋逋割產  
輒路藍縷厪厪僻立余家七葉舉塩莢叨上賈  
淮海江漢間逮伯父浸削逮先生而貧願先生  
雖蕭然貧乎居常閉戶塊處終日盥菽水以代  
梁肉曳漚澣以代紈綺日食酒三升陶陶勿問  
闔室舉火否里社有劇無不觀親匿卽草具延

欸先生嘻笑緩頰無不酣暢甲子之役督學使  
者耿公在事蘄陽少叅願長公寓書推轂欲以  
列高等廩先生先生爲弗屑也者而浮沉之迄  
江陵剽剽學校先生卒得及於寬政晚謝學官  
仲子如金繼補博士弟子先生籍手息肩喜可  
知矣長子如鐘早世無祿其震孫隕越顛沛先  
生噍噍不勝憂常書空作殷荊州態歲甲午祝  
令君舉行鄉約孳孳務在得人化俗成教閭里  
諸孝廉茂才三老僉謀舉先生首吳公周翰卽

族大父行郡邑稱密山先生者次程公潞爲程  
辰州公冢子三先生者或貢澤宮不赴或謝青  
衿不御年高德邵與物無競朔望讀法傾比落  
爭覲面聽田峻婦女至耳語以竺乾三身比之  
識者亦謂知言迺今先生逝而鼎折一足矣歿  
之晝風雨晦冥距所生嘉靖己丑得年六十七  
先生坦夷和易孝友誠壹不設城府不立町畛  
食貧矣然在約思純不聞貨取嗜酒矣然攝慎  
溫克不聞沉湎渾渾沌沌絕好棄智與溟滓遊

而少而壯而老益如一日也拘攣成敗者以家  
世素封履不食舊少先生無所事事第日中晏  
而月盈食會逢其適於先生何有要以里俗季  
世矣高名厚利其誰不波迺若度伊耆氏而上  
之機心內絕機事外屏解弢任放直將爲無懷  
爲葛天則無出先生右者語曰以貧賤有人難  
今六成四隱靳先生甚浸假可贖不難人百其  
身卽先生爲人狀具矣若享不讐德傳不訖家  
天高難問請埃之旣定余獲周事先生不諱不

避聊述梗槩胥命大雅

吳元功暨配汪烈婦狀

吳元功余疏屬也字伯讓少小業儒父少野氏大父方野氏並以經術廩學官名高郡邑中元功生而孱弱就外傳卽攻苦誦讀父母憐而寵之懼其力尪不能卒業謀令棄去服賈屬蹇脩籍籍汪太學一龍女賢淑遂委筐篚焉洪方汪固間右于歸之日盛爲資遣元功甫弱冠輒事事當父母意指得其歡心烈婦婉婉貞靜里中

賀吳得冢子冢婦並稱佳云居無何元功受成命携資斧客於武昌之富口富口楚濱江要地餘艫櫛比游者鱗次元功陳椽列肆亭於其間夙興夜寐知人任時凡樗蒲陸博鳴瑟站躡諸游俠戲堅白自守毫無磷緇元功卽羈旅少年乎諸賢豪長者學士縉紳迺爲賞譽謂賈豎中不應溷此名家子時少野氏方守文學功令於家人生產無所問一切倚辦元功迺元功屬婦善事其姑程勤女紅備滫髓傾身以下其妯娌

閨門邕穆賈業滋殖獨汪未宜子大以爲憂間  
歲歸覲恍然相對如有所失丙申春元功病瘵  
自楚返烈婦朝夕雪涕籲天請以身代里有以  
名醫告者則爲延致有以禱禱告者則謀厭禳  
倒庋傾橐不靳也自獻春逮夏徂更寒暑歷晝  
夜焦然宵衣侍臥起畧無倦弛會元功漸彌留  
烈婦持之泣元功囑曰家大人方就督學試我  
死願緩以聞大人故鍾情恐貽之憂且家督法  
在有後均之爲大人委脫也其以弟元臣元卿

谷一子嗣語竟而逝時六月二十九日也烈婦  
噉噉慟絕者屢保母隣媪臨視多方寬譬烈婦  
直經拊膺矢死飲泣飯含一一躬視凡紵於身  
木必精羨稅必繒絮事畢屏水漿不入口因出  
篋笥絲泉簪珥進姑章幾所昇伯妣幾所昇叔  
妣某券某貧窶付諸水火不留餘財幾幾旦夕  
相從於地下爾汪太學念獨女甚至女使數輩  
重迹狎至伺護甚嚴二尊人用元功遺言爲元  
功立後跽二嗣子階前進烈婦食烈婦不得聞

強應之然密已紉襚縫衾俟矣至八月朔有四日給守衛者出就食遂闔戶自經死蓋後元功死者三十四日諸與文學知交者感嘆悲哀爲聞之邑大夫請得旌表狗下邑余竊惟烈婦之捐生也殉所天也傷無後也元功之病天也戮力承家也匪好內也當汪氏就義時余耳目睹記辭舌稱難迺入楚而富口人交口譽元功與六戚四隱語合彼豈阿所好而故張之耶奉親竭力適遭短折從一而終率以遂志嫜節穆行惟夫與婦均之得死所矣余故狀之以俟傳孝烈者

先迪功逸事

奎弱冠曠曠草先迪功質行多掛漏迺今犬馬齒長不乘時披摺終就湮沒計先迪功所隆禮者莫如叅政維揚盛公侍御大坂汪公其論著可徵信其交誼不遐遺也因疏逸事十數則補所闕畧敢圖不朽於兩公先迪功年四十始舉奎聞年少時氣益一市業儒不肯竟大王父籍



祖父饒斤斤織畚族黨每狎其易與伯考務豪  
舉先迪功起而佐之並驅爭先夫已氏稍以腴  
削來嘗先迪功令紀綱程社胡德訟之府輒懼  
懾請解夫已氏大猾也憤而前值郡伯林好故  
抑大姓名爲平政攜稅冊事繪圖危語以中先  
迪功先迪功至謂獄有裏辟願其理何在大小  
姓等子民爾柰何長噤者風林首肯之遂反坐  
如律更歷數事虺夫不敢易常以踐更親賞解  
如京師遇業師宋公大武以昆季竹林會試同

舍放榜先一夕先迪功特爲貰酒坐達旦宋在  
座成進士者三携先迪功觀瓊林約無論疇昔  
卽忘此日者非夫也其後位各通顯屢召以書  
札皆不赴且無所關說獨大武公藩臬廣東取  
道儀真奎等方舞象猶及拜謁堦下宋公者美  
髯及腹温温君子也先迪功壯時孜孜務學手  
錄詩詞數十卷好臨摹趙承旨書吳興人許科  
有聲延致與遊日卽瘳瘳夜恒濡墨秉燭一二  
跋不休方曳裾壽國時有貴人途遇失引避貴

人怒曰何物小官藐長者如此詣所往覩屏障  
字畫迨勁喜問之左右以失引避對諷令聞之  
携所書來謁結爲知交方銅砵易鉄時河西客  
舍門如市漿酒藿肉日進見謀議履相錯刑牲  
爲盟誓東西南北之人業醴者罔不蠅集逮事  
竣衆心計先迪功重費橐中裝先迪功避諱不  
言德先迪功者托之酒筵幣帛歌妓優伶而休  
而歛而江右而山陝而周親而踈屬或醪設或  
分舉累月未已益極一時之侈一日鼓吹迎俎

豆數十几筵途噎鳴騶不前牧伯申公心知以  
先迪功故哂而爲之讓道倭寇犯維揚先迪功  
以蒲州師公委托爲疏闡河增月城甫畢工師  
公勞先迪功先迪功不敢當舉杯進酌師公曰  
島夷薄真州百姓鼠伏鳥窠卽高城深池安爲  
守之籍二天庇悔禍遠遁不費斗粟粒鏃神則  
繆壯明則師帥皆蒲州產也願爲公壽師公大  
噓引滿相引以爲重後以忤中貴逮先迪功泣  
別爲之經紀餽橐人兩賢之先迪功威儀嫺雅

言辭豪爽每衆中剖析是非利害如桓宣武叙  
巴蜀成敗雖盛氣者亦俛首心伏輿隸之趨蹌  
駟僮之革面特其小爾生平最豪華又最朴素  
族吳貢士建中以省母姨大耄率臨况先迪功  
客至咄嗟華筵備水陸貢士嘆平生所希覩落  
書室隆嘉禮犒勞餽贈動溢望外主帑者恒嘆  
不節而懼不繼然瑀鏤不爲玩弄純素不爲褻  
相飲不及沉湎遊不淹信宿則終身一日未嘗  
有童心焉好賢下士出自天性每接章縫盛爲

供帳治具無論里中迄今誦之過蘄陽而延館  
五周交驩二顧入廣陵而折節盛門推心侯氏  
其事也山人王先生寅禮部許先生穀皆與之  
情好綢繆咏言寄意非若今之夸毗子設財丐  
詞虛相標榜者比國家明經取士稍辨菽麥者  
類籍教成先迪功則不獨踈節闊目晝有課宵  
有程及月小試試分殿最及暮大試試嚴賞罰  
躬親抽誦品藝籍記後覈至凌晨丙夜祈寒暑  
雨伺之察之提撕之夏楚之俾呻吟佔俾不遺

餘力而授餐煥休之慈卒亦不廢世所稱嚴君  
嗃嗃其真罕儷哉承家七葉薄有益藏臧獲廝  
養常什伯數先迪功馭制以嚴犯則輒繩以理  
呼蹠庭除數之白挺交下時奎輩侍有難色先  
迪功怒罵曰唉若曹藐不識四維何物異日受  
其害思吾言噬臍無及矣先迪功桑梓海陽乃  
僑寓常什三在蘄春什五在邗江伯考弭棹相  
值擊鮮命酌率用爲常暮必會饌徵歌彌月不  
輟析產之日曾推蘄西肆宅讓沒齒未言人罕

知者邗江以庶母馮爲內主馮執事久有寵馮  
母王媪婺就邸中寄食賜予獨厚然不使操閨  
閣外權也奎章元臺試歸遣使館銅山會九月  
乍寒元衣絮章衣單別時膚粟先迪功庶得之  
恚甚逐王媪歸馮噤莫敢沮益王媪典諸甥衣  
食善挫鍼治繻故也月餘始得請母子同處以  
是先迪功棄貌諸孤時馮母王媪先後歸卒無  
煩言里丘多頌先迪功內政云大都先迪功不  
得意於儒棄而曳裾王門迨其倦則混迹賈區

解紛類王烈急公類弦高積著類計然節俠類  
巨卿本之方正孝友軌於人倫使世世萬子孫  
步趨寧憂過愆耶奈何渠燹失隊令黠桀奴雲  
龍道義覆轍相尋邗江之役一呼而赴義捐貲  
者不下千金武弁却步噫先廸功之規摹遠貽  
澤弘矣奎特紀之以詔後時萬曆壬寅秋七月  
金陵濠上齋書

母氏馮狀

先府君丈夫子六人伯文理以嫡當室仲爲余

叔爲文章季則文元五文彩六文輝季以下三  
人皆庶母馮出母諱某維揚儀真人儀真地故  
濱江爲南北吳楚要衝明令甲淮塩解捆所駐  
業醜者鱗集先大王父世賈塩筴先君修息前  
業遂什一在徽什九在揚內顧無與供饘餼者  
因蹇修致筐篚母馮年十七歸先君先君素豁  
達喜豪舉賓客請謝關說者趾相錯首倡義增  
築月城䟽濬淤河易稱塩鐵權爲銅諸大廢著  
關係縣官先君爲植商兌過從者門如市客至

輒命治具延欸自辰及酉或至再三先君惟願指氣使母馮能立辦先君幼習兩淮掌故每陳說便宜利弊按鹺使者多稱善名高誨忌至有幸其不然而媒孽之者然竟以天幸無他尋亦厭倦願爲人解紛居間日夕不休也母馮數微諫先君杜門絕客先君謂善稍稍低回引避爲淮南塩筴祭酒垂四十年卒免瑕疪之口嘉靖甲寅母馮初乳文元次乳文化早殤時奎章舉於家年齒相若先君携之儀真同席授經斥旁

舍爲塾先君早業儒壯用賈廢發憤教奎等積學始就外傳身自程督昧爽具朝醅趣令盥櫛薄暮持壺漿兼味相慰勞挑燈丙夜市餅餌伺而啖之聞伊吾聲始驩然就寢先君歷寒暑不輟母馮躬侍起居手日調劑亦未嘗有倦色隆慶改元先君築明經堂成時進士盛公稔文學程公廷用進士汪公以時迺在函丈隆禮有加朔望試文三日隨覆誦故所記經史藻別甲乙令洗沐歸覲母馮輒喜動顏色常語奎輩曰阿

翁與汝曹亢身亢宗不啻望歲幸勉旃母貽阿翁憂隨探皮閣中菓核分內懷袖呼應門送之館舍其能將順先君課子志意如此先是母馮家旁落又鮮兄弟母王寄食先君旅邸然性褊急御下操切每詢扶臧獲母馮輟爲改容謝之甲子乳文彩庚午乳文輝辛未文元弱冠侍先君歸受室適先君及耆里中置酒高會因治菟裘將歸老焉留滯一年遂以壬申八月八日捐棄諸孤訃聞母馮就所居爲靈哭之哀幾不勝

喪又明年奎以文元至真州告母馮東歸奔喪人方籍籍度母馮故主中饋母子相朝夕計生心有違言及母馮聞語才脫口遽攬泣趣治辦持故所衣物別母王氏從子以歸先君素交驩不下伯仟指莫不譽母知大體而嘆先君修閭政云歸之日屏膏沐剔鉛粉姑事適母程姐事奎母謝章母李油油罔間言卽歲時供給不饒然訕則取足於簪珥務佐其子結交賢豪三老也里婦求多或有譙訶以嘗之者母馮默然不

讐第徐爲婉軟使其人欣欣而去維揚嬖多匹  
嫡習競芬華母馮一旦矯而從俗坐是拮据髮  
種種早白丁丑文元肄業成均時以妻子徃未  
幾母馮欲召之歸寧使未發文元忽怦怦心動  
倉皇就道若有陰爲期會者行李抵里門時母  
馮尙無恙甫一逆之間闕遂掖扶入臥內帖席  
未安而瞑母論知與不知皆憐其母子之情而  
雪涕焉奎惟母馮天性婉婉聽從先君最嬖幸  
最所莊憚持正類樊姬教子希孟母精膳埒絡  
秀賢矣然而非其至也若千里匍匐去故卽新  
際豐約夷險之交曾不愆常改度群貳以和著  
困憊以慈見實小星之極楚而女德之聖善者  
卜塋霞塢墓木已拱奎並出庶孽幼籍阿保是  
用述母生平而狀之

先姊畢母吳孺人行狀

先姊喪畢氏業已八年於茲矣庚子畢伯子改  
厝青野堂之旁園待吉而塋會余長孫及仲子  
歿情神實喪越月餘始能拭淚狀之爲文以祭



嗟乎先府君舉余男女兄弟七人十年喪其三  
同生者痛將何如姊出母李姊之生先府君才  
舉嫡兄文理憂其孱弱得之懸悅之喜不減弧  
矢也姊性聰婉通達特不作媵柯委瑣態畢以  
世姻來議遂字焉年十九歸畢伯子內奉宗祊  
外應姻婭豐省中竅會無所失久之門內有事  
多姊爲植支屬勃蹊闖墻取片言立解先是伯  
子當室方習帖括繼母朱有寵家嚴爲蠱朝夕  
有意督過之媿媿吹毛洗垢移書先府君先府

君訶姊無他第遣女僕切責之曰好語畢甥閔  
損王祥何人哉頑嚚者重華之籍盤錯者利器  
之資所不善事尊章得其驩心者非吾女卽歸  
寧不復能覲吾面先府君故搯子姓嚴會畢姻  
復嗃嗃姊迺舉諸甥若而人盃冰菟廩廩以日  
爲歲矣畢伯子奔父喪扶柩歸姊始持家秉伯  
子自其王父伯羽先生以理學鳴海陽首推儒  
林獨行合出一人群從子孫多薄織畝而稱聲  
詩且也家世素封婚姻率間右竿牘筐篚歲時

餽遺費出不貲下逮伯子伯子好客叩門不以  
事辭過從者輒倒屣傾釀盡情而去產雖未減  
資斧已略喪失矣先府君棄藐諸孤後姊嘗假  
歸寧避宅外舍逮爲二子受室二女資裝遣嫁  
葦路藍縷蕭然煩費汲汲竣事庚議携家避地  
晉陵余時心不謂然與家季章力沮其行謀柅  
橐裝再四姊雪涕曰故鄉先隴做廬具在卽樂  
土可適誰能舍去第權之已熟利害剝膚勢不  
可耳余曰姊母以規爲瑱禍本在內勢必結外

得人則衛失衛則集事集後圖力不易矣姊曰  
誠如二弟言但繼母位尊失養名惡行子淹恤  
處婦審守倘事急計生媒孽其短而以尊行之  
被惡名而後出難乎免矣余無以難具糲糗戒  
舟徒送之屯溪僑寓晉陵年許朱果構無賴文  
致伯子供養餐錢不繼單辭受記傳丹書爲鬻  
產地亡何鬻伯子膏腴田亡何鬻伯子課租代  
舍括糠及米余輩憂之發急足促伯子歸訟之  
丁令君所年餘始辯裏辟難解家垂破姊還故

鄉爵爵飲恨益日涔涔淚頰面也會庚寅嘉平  
朔第文章無年蚤世明年姊臨哭撫棺哀痛怛  
然憂思不已三月返閔川寢劇忡忡切切僂僂  
涸涸肢體乍腫乍消司候女厮往來駱驛姊知  
殆不自濟卽伯子醫藥窮萬道無効竟以六月  
望後三日捐柩椁益病非湯熨鍼石酒醴所及  
多得之壹爵結惛傷肝脾云嗚呼姊生於吳適  
於畢高閔鼎族亦差相當乃姊特數竒始終厄  
於繼姑眉不暫伸目不終瞑伯子言念姊氏守

曾參之義波及於余硜硜相勗覆轍之鑿誰寔  
貽之難乎其爲姊矣雁行中獨余性類姊剛腸  
直口無脂膏無夸毗人多謂官壺非宜余嘗稱  
伯宗憇庇州犂女嬃申申詈原語云家有主母  
豪悍歛迹正須姊輩嗟乎姊喪幾年三弟傾橐  
於桀黠長兄軋沒於刁奴浸假姊女而男左提  
右挈余詎腐心於此轉令人憶吾姊耳伯子故  
多賢豪游必不以貧故沒姊德余因狀之以俟  
亡妻程氏行狀

天乎余之侘傺也宜所室長子孫中道天殂孰  
與其桑榆者乃年之不登名之不聞謂同室同  
穴何於是攬涕詮次遺行爲孺人狀孺人出塘  
尾程氏暘谷程長公女也王父程鏡泉公故與  
先廸功莫逆同舉鹽筴於維揚徵逐無時庚戌  
孺人生母王母大王母以三世無女絕憐愛之  
後二歲壬子先廸功得舉余耗喜鏡泉公不煩  
媒妁遂面訂婚姻約徽俗介庶子不無頡頏多  
從旁獻齟齬者鏡泉公每正色謝之會余幼負

雋聲從師講業餽遺有加幾幾望之成立也孺  
人年十九厚爲資遣歸余衆曹謂少姑二三人  
妯娌五六人大小相軋彼此相形以驕穉處之  
滋多口矣時丘嫂汪富而長且獨嫡無敢耦孺  
人不亢不抑進無煩言退無苑氣亡何弟婦程  
氏范氏後先至北面共事嫡母程孺人生母謝  
孺人又交臂奉庶母李母馮同居共爨以逮別  
析姊妹皆得其歡心油油循循閨閣絕勃谿聲  
時論難之辛未舉長子可中壬申舉次子可鏡

贊余襄先府君大事戚過於易乙亥舉長女愛容字金氏天丙子余肄業南雍屬春夏之交夢遺忽作月幾四十五夜踉蹌歸孺人暑不解衣夕不交睫萬道得無死丁丑治蓀坦新居成舉三子可晉母謝健嗽時搽家秉任審守余與孺人携之南雍乳抱客邸中戊寅舉次女京容字畢氏天巳卯春返就子舍舉四子可竒母謝年邁性竒嚴愈益甚孺人奉事惟謹寢疾進藥物饘飴比歿哭無時焦然毀瘠不須相室而治喪

如禮乙酉舉五子可獻丙戌舉六子可隨先是孺人孕而不育者二殯者再病幾不治至是米鹽繁碎拮据瘁瘁又助筵無人日在中饋與女僕雜作疾遂劇促余楚歸延醫得良藥愈灼之艾眠食始復故明年庚寅舉七子可馴壬辰舉八女足第孺人雖以乳哺子女事付諸傭婦乎乃燥濕疾苦不啻以身親之嘗丙夜兒啼雪寒甚篝燈強起內之懷且行且拊得就寢未幾寤復嗷如是者再天曙矣一日有不速之客至午

餐告罄余饑向孺人索食滹鷄卵者五余以三  
孺人以二群兒跳戲坐側哮咆就母手攫之分  
二爲四孺人竟忍饑而哂余呵之孺人曰無郵  
此孺子常也余往來湘湖間以館塾事屬孺人  
代詞孺人廉得諸兒遊台狀輒令童僕白經師  
復以母命督之過卽詣前謝更盱眙飲淚脉脉  
不語甚至閱易歲月故小兒依其柔愛大兒實  
憚其莊嚴里俗競簪珥絃服相高錐髻刺天帚  
裳曳地孺人性朴茂髮取結束布取漣澣綃縠

飾玩一無所御卽遇之與並亦無艷羨晚衆口  
食繁子女求紈綺者代以荅布覓梨栗者啖以  
蹲踞盃糲麻臬爲力易具常語余曰中人之  
產七兒一女倒庋傾筐不支也日長炎炎柰何  
搯勝人心媮快飽煖乎余性編門無雜賓都人  
士過從亦無虛日文字往來茗飲篋篋孺人厚  
薄隆殺各有意會逢空乏至重客則或貸諸隣  
或買之市務期稱物余性下持下特急又負才  
氣犇直處曹偶乏委蛇孺人視余外歸徵顏色

幾微迂輒從容爲和解所役小過匿不以聞情  
恕理遣之規朝夕三致意焉余家世業儒食報  
希闕先廸功欲責償於余弱冠見背藐諸孤倚  
辦一切卒業未能每快快撫卷太息孺人曰世  
界缺陷造物忌完君七葉有家幸猶未艾若之  
何得隴望蜀也引止足之分援倘來之誼寬辟  
笑語移時得請而後已甲午會家幹治賈與武  
弁構訟之兩淮陪京諸當路騷然煩費余憂動  
於色孺人計無復之皇悸卜筮崩漏疾作久之

召醫療治無効血枯柴立臥起無常然猶憑几  
督女厮治茹菽餒半歲供時時勞苦余俾斥舍  
旁考室不休也乙未冬臘月初十辰刻卒先時  
漏將盡呼余出床頭匏合盛筯鍵畀之執囑言  
二弱息累君耳平生未嘗以一縷私外家老母  
孀居願以奩中十金佐朝餐餘財分諸子婦餘  
衣飾付幼女也言竟氣自下體漸微慙慙而逝  
他無所痛苦計去嘉靖庚戌得年四十有六死  
之日里閨稱其賢淑臧獲哭其仁厚貧困感其

周恤無不嘖嘖爲余惜者余惟悼亡哀逝才情  
備至彼直宣瀉嫵嬾房闈之私耳若孺人則朝  
夕交脩免余於口實相夫淑而貞撫子慈而肅  
女德母儀兼隆並茂宛其死矣如棟摧將壓如  
甌墮斯缺少君之甕汲陶母之剉薦伯宗之辨  
友龐公之偕隱不過得一以誇耳語曰婦人學  
於姑一國三公莫適爲從追惟于歸之日其難  
言哉其難言哉余稚魯無當於觚墨第孺人從  
余垂三十年每側耳好聽余譚說故實其艷慕  
有在故不諱細瑣不飾鞞悅俾兒曹知母氏劬  
勞且以爲乞言地

誄

吳廷用太學誄

有序

萬曆十八年十二月二十四日明太學生吳  
廷用寢疾卒於蓀圻年三十九嗚呼哀哉里  
閭含酸士林雪涕余竊惟先府君丈夫子六  
人余與弟俱舉自壬子長僅十日生平歷履  
自幼而冠自冠而壯無之不與相左右迺廷



用之楚歸也會未匝月溘先朝露余責在後  
死間嘗謬圖不朽漫爲稱述第骨肉易諛諛  
則損真遜避多畧畧則失實每技淚以抽思  
輒欷歔而閣筆思杯酒締歡延之尚能標靖  
節之名聯姻瓜葛安仁且不沒仲武之誼况  
親叨骨肉和踰琴瑟如我於廷用可無述哉  
且也廷用年不配德聲不暢實百行無點一  
志莫酬苟覲顏自愧不文是負心終成欠事  
展禽之妻曰誅其德二三子不如我之知夫

子也由斯而言知弟莫如兄敢煩三管用據  
百憂表之素旂以告道周遂作誄曰

媿歟介弟人貌榮名延州胤秀五月篤生田文  
眇小季札休明竒服媵躅厲自弱齡翱翔藝圃  
獵華掇英矢志青紫亢宗是程甫冠失怙鍛翮  
柴荆薄游國子待次陪京勃谿諄語弟靡易涅  
子敦孝友終始罔缺臨財推讓邁難標節掇皮  
皆真吐辭痴絕萋萋怡怡庭闈胥悅亦好延納  
埋照和光傾蓋久要匪賢卽良削眡刳域肉藿

酒漿推赤飲醇羞足相方人之念之莊惠范張  
姊嬃急難惟子往赴不避險阻不畏權蠹仗義  
執言螻蟻無苦橐餗分金終惠是務程舅雙雛  
瞽而且愚黃口易與蒼天難呼子率諸倩僵仆  
用扶計存李變義立趙孤頻年薦饑比閭窮窶  
布奴在朱人贖歸魯却直弗受假以毛羽桀黠  
頑冥卒喪資斧仁心爲質觸念好施片言脫口  
百折不移歡彼愉樂恤彼陵夷藎髀掩骼解紛  
償疑予匪企報德畏見知守口呐呐臨機确确

引命自安需時宴樂竹素寄踪茅屋抱璞古貌  
古心未雕未琢莫或人負負我不憂罔敢召侮  
侮至不酬宗祏罔隸式好無尤赫赫司命福善  
滋休茫昧叵測斯人何仇子殤妻逝寢疾彌留  
嗚呼哀哉庚寅之冬羈棲楚東連牀聽雨浮白  
送鴻無何別去音問猶通兆我魂夢增我怔忡  
遺占後至求訣無窮摧苗落穎志業未融無年  
投塵叫號高穹嗚呼哀哉惟我與子共逢不辰  
叢出庶孽母氏酸辛遡幼逮壯疴痛維均墳簞

迭奏形影相因孤唱必和有屈必伸田廬互倚  
杯竿更陳譏俗妬媵嘲諛效顰信心莫逆不廢  
懿親如彼蚤蚤得甘則呼如彼駟驢遇難負趨  
於今已矣承諱屬孤言念朝夕腸結眼枯嗚呼  
哀哉日往月來寒盡暑續金鑑埋光龍泉閉斲  
引樞心摧臨窆氣促天遂幾何末路不空餘  
鄉評百身願贖嗚呼哀哉

明故行唐縣儒學教諭君載先生胡公誄  
有序

歲在戊戌胡公君載先生卒於官訃聞諸當  
路賻卹之得持喪歸故里里中都人士爭犇  
迎賈第拜道左越二年辛丑其子茂才宗伊  
爲日卜葬邀惠作者屬知交論者爲之地於  
是友人程涓狀之詳矣悉矣弗可加矣吳文  
奎乃托郝公貴賤操筆之誼而誄焉嗚呼哀  
哉稟采豐華古往凶歸一官憔悴萬里崎嶇  
士慘模範之無依鄉陰龜鑑之未逝映雪囊  
螢雖慙快於鹿鳴素旗丹旒已邁閔於鵬至

產屢減乎俊選之日客每誤乎期會之時若  
乃濬心哲性績學惜陰耽精肆志摘藻敷珍  
傳經高絳帳之精專踈財襲青氈之曠達葉  
出而扶踈干雲附生而孝友成性制科則把  
臂瞿唐居鄉則齊驅王石剗割則純鉤謝銛  
孚尹則璵璠掩潤匪一善以可名竟百身而  
莫贖哲人其類徽音未播且也連墻比壤接  
塵齊年交忝竊於莊惠好締結於朱陳卽推  
曾乎無文亦情鬱焉思寫遂誄曰

於鑠重華毓靈孕秀裔篤吉人儒林領袖選勝  
卜遷樂土攸就竒服好脩方毅而富別墅經營  
竹苞松茂聚族以居餘慶輻輳天挺先生明昌  
景胄顯允乃考義方特勤外傳出就擔負擇隣  
夙慧蚤智朝令夕申砥礪剪菝邁衆絕塵旣廩  
庠序冠冕儒紳射宮歷試槐市酸辛小挫彌厲  
辟終別珉先達賞譽後進來學居並公超章相  
追琢網羅俊髦結社揚摧狎主齊盟望並山嶽  
筆陳射鵰鈞天廣樂材數新都前茅誰角乙酉

晚成快覩鶯鷺人曰雄鳴公曰嗟吁養不逮親  
覩藐諸孤河潤九里國此一儒尊顯畢志尚負  
先劬循墻而走辟咄是俱里門徒步父黨過趨  
寬和樂易自禔瞿瞿汲短綆長褚大懷畜春流  
暴腮天飛鍛翼荏苒居諸艱難家食浪迹廣文  
使我心惻心惻伊何搏風息力首偕終殮桃李  
甫植檝具濤翻雲銷月蝕豈不展采電掣倏收  
豈不重積膏屯未流巖巖七尺炯炯雙眸存空  
問舌失匪責頭無兒伯道出綴箕裘申詈女嬃

相好無尤田荆姜被白首綢繆家步中艱矢志  
開泰瓊琦顙俊宗祊利賴惠渥寡嫠施暨中外  
逋負則蠲罪疑醪欽穉裝筆疇漑灌書帶啓祐  
後人青衿藹藹企償金章翻奪銀艾嗚呼哀哉  
茹荼遡往微懿必傳都養罷席請謁避權名立  
士附賓客喧填漿酒藿肉典裘貫鞵奉身一器  
藏經數椽博奕蕭散卮竿踟躕劔試摧鏑鑑墮  
失圓嗚呼哀哉詩味宜人易重交愛公善閑家  
譽逮嘉配簪珥佐歡荆布理內旣長子孫溘先

遊岱未言念之鳩媒恥再義綵糟糠情捐粉黛  
波及朋儕申尹無悔嗚呼哀哉瞻彼雲巖霾曉  
倏橫睇彼溪泚沙礫迴衡有斐人傑奄忽露零  
辰州埋玉盼鄉專城行唐擢桂羈旅友生桑梓  
牢落親串屏營黃童白叟灑泣鄉評嗚呼哀哉  
著雍素秋傾市祖帳屠維朱明移書悒舐休文  
病軀季膺宦况霸輻褚襖冰霜飄颺藐矣清真  
遐哉謔浪人誰不思思誰不悵悠悠顛蒼滅沒  
骯髒嗚呼哀哉返魂無術大歸不回卜其宅兆

祭文

祭吳明卿老師文

載闢草萊九招嗣恨三號孔哀抑揚高下競爽  
多才火傳薪盡奕葉士魁充途泗涕比屋怨猜  
生死交情執紼酌杯嗚呼哀哉

嗚呼先生其遽長逝耶奎生也晚甫舞象先生  
雄飛青瑣秉節朝端甫弱冠先生振鐸百蠻傳  
經貴竹逮望壯楚游而先生已解綬大梁浩狀  
懸車也持刺堂下辱先生締忘年交久之念孺

子可教納之門墻放歌花下列籍林間便坐深  
杯問竒道故卽班椽修載張禹彭宣事不啻遠  
過之矣先生遺以手札謂十年交誼金石彌固  
嗟嗟長者國士之遇鯁生何幸親承之惟是癸  
巳之春屈覽揆嘉辰千里稱觴冀卒歲侍側虛  
往實歸奈何昊天不吊竟奪吾師之速耶夫吊  
慶相倚彭殤同盡卽道流貪生釋部怛化皆不  
能免者先生高世大儒存順沒寧且也文章德  
業照耀終古夫復何憾第吾黨小子慨哲人之

先萎悵仰止之無從屈指往事攬涕新封空引  
頌於雲漢徒叫號乎高穹歲忽晷晚治任東歸  
椒漿致奠髮鬢音微先生之英靈精爽翩翩然  
驟鸞馭鶴其爲我舉一觴焉

同里祭胡雲橋先生文

嗚呼雲橋遽大歸耶里中二二三兄弟英聲茂實  
展采筮仕日可見之行者孰與雲橋而雲橋乃  
遽大歸耶吾里在休南牧濟濟多士素號蓋都  
以山勢峻嶒谿流清激故其人磊落特達多才

有口者舊傳聞龍自林竹而南來水自高視而  
北去壬子之役辰州開創春秋聯捷清白著聲  
四十而擁專城於時巒壑深秀視橋落成則山  
水之爲也乙酉之役雲橋代興秉羽先登聲名  
籍甚於時山脈未戕視橋重構則亦山水之爲  
也今者山童而伐石硜硜矣橋頽而水石纍纍  
矣雲橋之訃會逢其適說者咸歸咎於山川竅  
鑿至引無妄奏泊諸事錯愕轉相爲証嗚呼河  
嶽效靈賢哲篤生人之云亡里丘憔悴雲橋溢

先朝露其果以是耶抑非以是耶浸假謂是則  
見兔顧犬亡羊補牢吾儕二三兄弟尙猶未晚  
第雲橋則朱絃一絕不復續矣延津一躍不復  
合矣浸假謂非則旣授其才復畱其筭畀雲橋  
以榮名奪雲橋以厚實天道悽悽詰司命者以  
故將安所置對耶雲橋束髮爲諸生厥考督之  
學攻苦受易不遺餘力月幾幾四十五日逮廩  
食費舍抗聲髦俊下帷傳經從者如雲束脩則  
餘鎚負郭則餘粟庶幾有絳帳流風矣柰何數



上春官減產以資行李家食浹辰借貸以贍賓  
客稱孝廉者若而年厯厯藏書一室授子一經  
穆然擅邑屋之譽他無有也通籍儒官寄身萬  
里首藉枿空廣文氈冷猶然殞其侍媛折其天  
年月俸幾何曾不得坐享待遷操銅墨而行志  
焉嗚呼天之阨雲橋亦其甚矣卽踈逃匪親牧  
豎匪類目擊思存莫不酸鼻拭淚况吾輩二三  
兄弟耶接塵而游連牆而處或筆研相印証或  
昕夕相徵逐杯酒踟躕謔浪酬酢盃所謂朱陳

蕭張肺腑而莫逆也者彼兩年來南北各天卒  
不以睽隔而廢尺一第謂雲橋卷舒有時終當  
胡老華顛角巾故里相從媿快暮年爾迺今則  
楮墨未渝音容未絕矣謂選之祖成終天之訣  
矣雖吾輩與雲橋均之誦周孔繹老莊洞晰生  
死去來之因灑然條然視彭殤年無修短視三  
旌一命官無大小視間關桑梓地無彼此其如  
觸境生情撫時感舊何哉輻車在野旌旒在望  
悼運命之難齊痛英哲之蚤逝旅脩清醑庶羞

之薦益有遐思焉非直爲里閭交游已也嗚呼  
雲橋魂兮歸來其尙爲二三兄弟歆饗之

祭廷用弟文

嗚呼廷用之棄我二三兄弟而逝也三年於茲  
矣先府君舉我兄弟六人我兄弟長廿年者長  
十日者少數年者少十年有奇者籍先府君寵  
靈俱比肩接塵嬉遊明盛而廷用頽偃然寢臥  
耶豈二三兄弟徼其幸而廷用獨際其否耶廷  
用在鴈行中頂有其文情篤於義不矜激而亢

不媿媿而媚臨難若爭讓財若避怡怡肫肫終  
始如一習我二三兄弟者孰不以胡老華顛爲  
廷用期而廷用獨夭死耶豈薄於德者頽厚於  
命而厚於德者反薄於命耶昔人嘆無年丈夫  
患無身懼功不立而志不竟也廷用應制科不  
遂去爲廢著廢著不遂鬱伊多疾先二三兄弟  
賚志以沒騏驥繫足於長途鷹隼鍛翮於羊角  
何耶豈天道猶張弓高者下之抑者揚之其父  
析薪其子能負將不於身於子孫耶魯論謂仁

者壽月令謂壽者非有以損益之各畢其數我  
二三兄弟所共聞者乃慈祥愷悌仁孰與廷用  
而卒若爾何聖賢言未可據而廷用適遭之數  
易畢也豈小年大年天實爲之朝菌不及晦蟪  
蛄不及秋分實限之耶益棺論定人情非可以  
延納劫奪得者自古夭折匪一至廷用謝世而  
白叟黃童皆爲流涕我二三兄弟固同氣之戚  
無間言者視手足痿痺枝葉凋瘁其將能爲情  
耶不能爲情耶魂不可招魄不可攝巫咸不可

卜天高不可問少而先摧二三兄弟之老誰與  
共遲暮壯而蚤夭二三兄弟之少誰與樹典刑  
嗚呼痛哉解之者稱藐爾二孤廷用恃以不亡  
討而訓之扶而植之卽二三兄弟所以存廷用  
嗚呼人世骨肉兄弟之情徐行並坐吊苦問疾  
更衣共食其呼吸相通休戚相關何如者而今  
塵寄之此哉嗚呼痛哉蕙幃將撤靈車將駕窀  
穸已卜雨雪滿野椒漿設奠千古未絕廷用之  
不忍去我二三兄弟猶二三兄弟之不能去廷

用也不盡者物不昧者心其尙鑒之於冥漠耶  
嗚呼痛哉尙饗

祭女兒畢母吳孺人文

嗚呼姊氏溘先長夜頃緣改卜靈輶更駕拮据  
瘁瘁時爾初夏乍聞失措倉卒無暇聚族僉謀  
請從寬假忽素秋之將分攬涕淚其屢瀉嗚呼  
時世風波羿彀滿持嗟策筵方蔽於路悵悵焉  
莫知所之况我姊氏同氣連枝鴈行凌亂裘殆  
叅差百憂雖終日其綰結那能不鬱陶以見思

天之降割閔凶縱橫一紀之內夭折我季弟客  
死我長兄姊當壯年朝露蚤零脩短較異榮瘁  
難評壽者人之各畢其數生者視之忍恻然其  
爲情柰之何姊其往矣復絕仲甥奎苟視息戚  
埒喪明其他或家落於壬宵或橐罄於桀黠生  
產廢著資斧玷缺浸假姊在其長嘆太息不知  
當如何其蘊結嗚呼盛衰倚伏慶吊變遷曩胡  
儼儼今胡箋箋曩胡炎炎今胡奄奄展轉深惟  
彼蒼者天靈公爲靈久矣其然明達如姊卽冥

漢幽玄之中又何愴焉奎與伯子跡未契闊心  
更纏綿且渭陽之情久而彌專皆推姊屋烏遺  
愛寧獨夫君之惇慈與宅相之象賢伯子垂白  
奎向虞淵兩人者俱桑榆暮齒能復必其餘晷  
幾年小構別墅訂約週旋藐爾諸孤教率勉旃  
講秦晉於百世慰朱陳於九泉寸心未朽不負  
斯言但追數姊德涕泗沾裳弟有小媿姊用揄  
揚弟有隱慝姊是覆藏歲時筐篚倒庋傾箱母  
庶屬衆斟酌劑量此不以適長款洽彼不以胞

乳趨踰曾壯夫處之愧色乃姊氏應而允臧生  
平相厄繼姑在堂梗概列狀更僕言長嗚呼哀  
哉狄姊之淵識不媿李弟之藝鬚未遑求懷懿  
親枯眼斷腸何以徵德人鬼相望何以表哀蕙  
肴椒漿姊其鑒之鸞鶴翱翔嗚呼哀哉尚饗

祭亡室程孺人文

嗟嗟哀哉余與孺人居長子孫廿八於茲矣踰  
四望五期末路相將迺今願棄柩櫓而溘先朝  
露乎夫閨闈之隱孌婉之私牧豎尋常猶知戀

戀也者我輩正情所鍾其何能不惻然且也撫  
今追昔孺人有大造於余守口進規三思獻悃  
甚且丙夜哀怨動以至誠我是以任放自喜而  
免跣跣之讐逢怒暫從退多諍沮甚且指日誓  
天要毋藏宿我是以忘情報復而免怨毒之樹  
鴈鳩廣愛响嚙撫摩質錢飼哺語語調和我是  
以朝昏督課而免責善之離夙與夜寐弗遑寧  
處酒漿是潔蒸嘗是舉蘋蘩中饋咄嗟而具我  
是以請謝自豪而免細事之親斗粟尺帛鄭重

取予斟酌奢涼從夫用譽我是以析薪能負而  
家不中落醉飽必伺寒燠必覘祭祀市藥傾橐  
不言我是以壯健猶少而沉痾復痊嗟嗟哀哉  
孺人豈真爲衾裯夫婦之小于喁相慕悅耶借  
云盡人可妻欲希心莊生之達解於余懷無繇  
矣然孺人居常恒謂余婦人大幸死居夫先逮  
病篤矣又謂余死者人不免老幼死耳病革矣  
又謂余君幸自愛諸幼兒女賴料理餘不贅一  
詞嗟嗟哀哉孺人卽見不出閫內其洞生死之

故晰緩急之宜加都人士一等矣凡此皆可以無死而孺人竟夭死乎古稱公宮聖善莫如大姪太姒共姜輩乃大期奄至偕老願違有司命在人且柰之何哉願余反復孺人所以不能釋憾者在二三幼穉二三幼穉可以使孺人無遺憾者在余余後孺人死思報孺人一額其必無漁少艾無滋庶孽俾卯者翼翼者蜚死復生而生不愧其言庶幾異日相從九地融融而洩洩哉古祭必有誓誓斯通於神明敢布腹心天日爲正惟靈諒我其來格享乎

疏

吳用晦建井亭觀音庵募緣疏

有序

家季榮以字行曰瞽生吳用晦者業已賣卜有聲邑屋矣先是獨子道衡出亡倉皇計無所出苦難思怵默禱觀音大士謂榮與息子共存亡籍庇神通返轍有日卽貧當丐諸大德長者翊祠宇以荅洪休因屏葷酒躡屣慷慨出門亡何蹤跡得之寓某塾且爲善視俾儕其子肄業

後數年道衡辭歸下帷發憤會中寒語諄復前  
事不絕聲用晦聞之不啻飲冰病間踵余門求  
題疏併乞井亭地曰是磽确一席地問渡之孔  
道里門之關鎖也於堪輿當築基列椽藩蔽西  
北凡有胸無心誰不奮臂自稱檀越余曰嗟乎  
用晦君平下簾季主蚤見用意良善願里俗季  
矣談揮霍於彫敝之鄉雖喙長三尺其誰信之  
曩者議禁伐石於鎮山議築樓閣於水口卒之  
噴有煩言寸功安在益非常之原黎民懼焉如

用晦曰發心不昧隨緣佈施彼將曰生端作偏  
饒潤自肥用晦曰頭會箕歛帑寄富人彼將曰  
借面動衆功隳九仞故高棟連雲飛薨蔽日矢  
期傑構競先營繕此可望之金穴如林非吾臨  
溪所能企也縱橫聯絡別戶分門剖判立趨刀  
布坐集此可望之宰官魁士非吾用晦所能辦  
也無已則薦藻芷而羞溪毛匠子心行子意力  
省成速用晦盲目人庶幾不負初心哉且也西  
方大士圓通普濟父阿彌陀而第大勢維摩丈



室固其門宗化身應度無央無邊視支那世界  
如閻浮堤一聚落視牧豎疾苦如在身一疔瘡  
具曰精誠附影荅響圭撮錙銖不必減百千萬  
億茅茨土階不必減瓊瑤雕峻貧者不以貨財  
神其鑿之栖宅降佑矣臨溪山磊砢水湍激代  
多賢豪維嶽降申能不動念昔先廸功賚志以  
沒寔耳其言徒以日者之役太行九折反頽却  
步迄今論定諸在事各有悔心異日天牖厥衷  
傾否塞違母爲戎首亦當竭厯用晦此一舉譬  
之先聲嚆矢里中尸而祝之余小子社而稷之  
矣序次募緣本意於是率家弟兄施井亭地爲  
之䟽䟽曰

有感必應神通受命如嚮施財是福慈悲發念  
卽因况井亭古道大士上眞獲顯佑於一人寔  
崇隆於九有瓊階金祀寧須過望窮簷寶絡珠  
瓔亦各經營精舍惟茲善男信女吉士達人損  
困廋之半粟助庵寺之把茅移靈山於天外置  
普陀於域中兩峰排闥雖曠蕩如闢戶而高刹

中屏將環鍵同鎖鑰廟貌巍峩往來憇而具瞻  
美神明赫奕梵唄肅而福澤滋功德久矣不磨  
街坊於斯爲盛

贊

自題小像

爾貌昂然爾腹便然爾興翩翩結客乎身名未  
泰明經乎遭徊不前風雨尊酒昕夕簡編噫嘻  
匪虎匪兕或儒或玄涉世者已三十九年平如  
砥直如弦木之不才者能終其天年人於爾乎

奚憐

三弟廷用太學像贊

有序

余自庚寅秋別弟不復見顏色矣逮臘月廿  
四而弟捐館舍雖前後入夢恍如生平然無  
由攝魄返魂作而與之對也三十九年友于  
手足耿耿心目間顧瞻遺像不覺泫然雪涕  
因題數語用括大端歷履生卒則有余行狀  
與誄及學士先生之論著在

夫儒冠青衫綠帶革烏匡坐潭思者非吾弟廷

用太學耶眉清而秀視短而妍色萎而皙鬢黝而鬢顧隱而露體癯而弦起居鄭重言笑踈蹠貌之十得八九瞻之儼其在前至孝悌成性琬琰爲心踈財重義推赤篤親薛苞不得專友讓太初不得誇義仁吁嗟哉百世一見千里一人周昉縱摹其聲欬長康難寫其精神吾卽能銘鏤肺腑而終不能筆札其真

三弟婦程氏贊

貌之厖然其垂祐乎色之悄然其憂虞乎鵲有

其巢鳳能將雛雖宮壺已不朽又何恨於天殂

汪惟清像贊

于愍于愍豐下昂眉望則亭亭就則嘻嘻吾聞隱於行賈數十年而楚東老長樂其惠施尸而祝之若畏壘也者若人斯誰噫是謂渾沌未竅純白不緇而爲汪氏寧馨之兒

如竹美人贊

兔園兮淇澳檀欒兮修竹韻曼鳴絃色侵蒼琅鸞鷲戲其梢鵲鸞托以宿噫嘻此君何可一日

無也宋玉東家子寔肖之吾欲貯以金屋

自題像贊

俠也與哉唯諾不侵胡然而敦篤彛倫儒也與  
哉砥礪行誼胡然而歷落崎嶇狂也與哉高視  
逖覽胡然而退讓逡巡士也與哉朝經暮史胡  
然而混俗同塵賈也與哉左刀右孔胡然而賞  
譽摛紳逸也與哉鑿池種樹胡然而恤緯憂旻  
通也與哉雄飛鷗化胡然而衆口食貧樵也與  
哉朴茂戇直胡然而挾藻摛文藝也與哉方舟

結駟胡然而索處離群已卯之際吾見若沾沾  
閭閻戊子之前吾見若炎炎隆隆乙未之後吾  
見若梅梅紘紘壘空之在大澤而若是遊不知  
者謂若無求知之者謂若心憂微乎微乎其以  
棲託於廣莫之野而放浪於懷葛之疇

亡室像贊

有序

嬪程孺人生於嘉靖庚戌九月廿三日卒於  
萬曆乙未臘月初十日寅時得年四十有六  
先是病血崩者浹歲醫告技單而嬪程猶諱

死予乃未敢以像請迨易簣族史遽貌之百不肖一聞豫章龔史良余楚游可中輩強貌之付裝演家顧其解衣盤礴時兒子憶母氏擘畫摹擬不遺餘力然塵塵百得一二耳温公曰凡人圖像一筆不肖卽非吾父母誠爲此拘拘則何以慰籍刻木圖像寄思風木者哉願茲像也更之猶拾潘存之猶喻日况畫力五百年而竭女德明章千載如新若之何鶩皮毛而舍神髓也且也余於程嬪有琴瑟諧點畫所加神靈攸托是故壺範已具行狀矣因茲像肖否摘而爲之讚爲我子孫試凝神返視儼然若或見之

容之美秀而莊嚴也鬢之曼而可鑑也額之方而有文也面之長而白皙也吾室有之胡其似之也準之脩而適中也眉之曲而規也耳之倚而唇之丹也齒之小而視之端也吾室具之胡其畧之也聲音之清婉也性情之滂綽閉藏也婦之順而母之慈也吾室兼之胡影無以施其

巧而文有以摹其真也是吾題識意也噫

癸卯避暑孫園題孫子真寫茂文小影

大澤曠蕩暑空瓌琦布衣帛冠遨遊以嬉彼已  
之子豈世獨遺豹隱澤霧鵬搏俟期井渫不食  
傷惻失時風塵掩藹道路委蛇逃虛避匿樂志  
憂危猥云離索圖史是披猥云醉醒蟹螯是持  
負郭不有握笑不知外微嗟岍內豐坦夷娶詎  
姬姜亦既螽斯後詎寧馨亦識吾伊陶上矜散  
柱下寶慈克拓始願聖賢在茲惜哉蓬累莫究

厥施有鰥老大丘園棲遲耽玩泉石骯髒攸宜  
跋

跋介如上人書程巨源來鹿園記後

余里中園林以什伯數獨程氏最勝諸程園林  
以什數獨來鹿最聞聞不在大小華約則其人  
以也來鹿主人爲巨源先生食貧好客文章名  
世猶然困縫掖乎而名籍出公卿上戶外賓朋  
樓相錯巨源茗飲供具多在來鹿園不佞暇恒  
過從選勝靡不命酌池上松陰泰初醉茶宴游

欲遍園中初月微廳輕烟積雪景之幻出媚人  
誠有如巨源所記者疊疊二千餘言描寫設色  
其摩詰自圖輞川耶憶弁州稱盡力塵八九百  
年文可不朽果爾巨源之長有其園寧有窮盡  
時耶介師書圓勁雅緻妙得智未心印視記文  
水清玉潤足稱雙美結夏有緣吾儕當拉向寫  
經臺清齋說法留來鹿園他日一段快事也

莫雲卿送春賦跋

余曩浪遊楚黃儻居武穴友人詹淑正過訪與

之飲酒江上出行李中屠吳諸贈言觀余最後  
得莫雲卿楷書一賦風流自賞翩翩多致余展  
玩不忍釋手淑正曰廉者不求貪者不與胡不  
携旅邸摹之因示兒鏡摹數紙憶程聖卿雅習  
莫少小萍聚白下時以所書楷筆示人沾沾自  
喜余輩爭欲購之不可得今三十年許書者賞  
者摹者俱化爲異物矣噫笑卯夏六月兒輩陳  
篋拈出姑識其始末如此

跋程巨源贈范惟蕃人蜀五申

昔人論蜀道難言之有謂上青天者易言之有謂履平地者彼直寄寓焉以爲贊刺也若范惟蕃之入蜀以侍其家嚴原易先生往則快哉壯遊無爲論難易矣巨源與惟蕃累世通家贖行以言鋪張華陽故實歸之于正惟蕃洵非黷貨聃色者迺申之山川形勝申之人物藻翰猶未已而標的以武侯其意念深矣不佞嘗謬評武侯鼎足相業根極在澹泊寧靜四言舉以衡惟蕃信矣惟蕃葛衣徒步赴友生之會與然觚而不堅張然虛而不萃瀟然恍然於世故不數數然治身如彼緒餘可知第今天下皇路清夷制科取士士匪文章不飾矣雉文章匪遊覽不變神奇山水之勝西蜀以最聞昔太史公歷湘沅下會稽而文益奇其在惟蕃斯行哉其在惟蕃斯行哉若右軍帖所問常璩志所陳不佞雅臥遊畜疑請介紹數語質之他日

刻太冲遺詩引

家季太冲平生最嚴事不佞步步趨趨唯唯諾



諾若影赴形若嚮荅聲譏俗好讒語至調而目  
之以賀知章太冲曰我伯氏不和誰當和者已  
卯余下第歸間以制科餘力學爲聲詩第輒取  
漢魏古選初唐五七言律日加諷味避人淫思  
經歲成帙亡何第捐賓客時庚寅嘉平月廿四  
也檢篋中得此吁噓流涕者屢言念太冲工於  
爲人朴茂真醇月旦猶昨乃甫擗管而工於爲  
詩誰復知之籍令不夭所謂五十而詩名成詎  
獨昔人已耶惜也天寔限之然吉光片羽玄山  
粒禾自是異物爰拔俊句勒彼堅珉噫遠則日  
休禎王筠之秀近則元美捩子相之竒寧獨賞  
其淵玄無亦寄其慨慕耳

跋先迪功公墨妙下

勝國時吳興趙承旨行書高天下于二王稱人  
室弟子嘉靖間吳興水東許先生步趨承旨名  
噪一時作令江夏先君曳裾壽藩兩相結納罷  
官來山中特訪焉先君素工臨池爲體水東競  
爽爭竒甲午秋棄孤遊岱宗已二十三年檢度

簾中裝演成軸懸之山堂瞻仰再四不覺泪浪浪沾襟袖憶垂髫時夜讀先君燒燭染翰燭二跋未肯休恍夢中事也夫字爲心畫先君生平豪舉倜儻之氣隱隱露毫楮間卽令碩長康陸探微貌之寧能彷彿萬一耶百世手澤璠璣珍重子孫思先君不得見出此展覲庶幾哉親承馨歎矣

延熹帖引

夫吾吳臨溪稱土著矣溯卜遷之始在五代間

然去延熹尙八百餘年歷漢魏二晉六朝隋唐寥寥文獻東密無屯壘之迹方興乏簡栖之文厯厯市肆如墉搜竒好古之夫徃徃短氣余嘗戲語程巨源兩生嚶嚶慕古卽桑梓湮沒柰後來何壬寅冬余出橐佐家姪一麟一鳳舉祖父喪歸報坎舍后土山丈有咫尺得古式磚槲中化烏有亟令僕夫掩之然輒多古文竒字不可識余亟徃視持一片歸按其篆隸年月知爲東漢千五百年物范文穆云漢人作隸雖不尙工

拙然皆有筆勢腕力其法嚴於後世正與此合  
噫嘻論輓則銅雀尚屬後塵論書則蘭亭猶落  
行草古雅絕倫儒林珍重昔人當地裂南北之  
時常望海內廓清摹採碑板矧里丘咫尺千襪  
靈闕一旦得之喜可知矣東坡詩君家子敬十  
六字氣壓鄴侯三萬籤將無類是耶移書程巨  
源互訪賡和存他日里閤一段奇事蓀園東南  
隙地可館函之壁中題以延熹屬兒可晉雙鈞  
登之石時萬曆癸卯三月十五日也

祝令君鈞臺歌跋

余弱冠獲奉辰州公杖屨公脩渾沌氏之術恬  
憺簡遠絕無軒冕意態而其鈞非鈞也以爲寄  
寓非寄寓也以爲取適非取適也渾渾淪淪一  
種出世光景似當於桐江羊裘蟠溪釣璜外求  
之迺今君歌辭雄壯爾雅描寫欲盡而書法則  
自豫章平原來勁姿逸趣迭出爭奇詩中有畫  
足與使君傳神字中有詩足與漁磯設色程氏  
世守此卷豈直家乘珍重其亦里閤掌故哉異

日者桃花水長綠樹蒼崕斐亶掩映間記取卷  
 中詩登釣臺倚醉歌之當令羸女吹簫馮夷擊  
 鼓樂哉斯石安知公不翩翩若水君乘馬來波  
 上耶來則亟召我我酷憶前輩風流冀望見公  
 顏色也

五

公

公

公



卷之五